

AUTOBIOGRAPĖJĖ

Rudis Edvards

Gėmiau 1936 m. groudė 15 d. Muosiedie (Skouda r.), tėn augau, 1955 m. bėngiau vėdorėnė. Po tuo lig 1960 m. muokiaus Lietovuos žemės ūkė akademėjuo Kaunė. Tėn ėgėjau muokslėnė agruonuoma-ėkuonuomista specelībė. Dėrbtė grįžau i Skouda rajuona. Tėn ėšvargau aplė tris metus. Dėrbau agruonuomo, pėrmininko Loknės kolkuozė. Bedėrbdams sava kailio isėtėkėnau, ka ėš kolkuozėnės sistemas nieka gra nier ė bŭtė negal. Gėvendams Skouda rajuonė ė apsėžanėjau. Žmuona Zita pagimdė sūnieli Arūna. Karto so Zito pradiejov kortė planus, kėp ėšlėptė ėš tuo kolkuozėnė liūna, i korin tumet sava nuoro bovau lig pat ausū ismokės. Bova do bŭdā – arba nosėgertė, ka niekam nebderietomi ė tavi kap mosi ėš batvėnėnės ėšmestom laukuonās, arba pradietė tuoliau muokītėis. Pasėrinkau ontrouji kieli ė istuojau muokītėis i aspėrantūra. Bova Maskvuos Ministru tarības notarėms, ka nieks tuokėms asmėnims negal sotrokdītė ėšėtė ėš darba. Bet skoudėškems – J. Balkou ė Staneikā (anėi bova partėjės sekretuorė) tas nieka nereiškė, ė anėi mon aplė metus laika trokdė pasėtrauktė ėš rajuona (neatėdavė vadėnamas ĩskaitas kortelės). Bet galŭ galė, pamatė, ka solaikītė nepavėks, ėšleida, bet puonou Sniečkou parašė, ka ėš esous negabos, vuos ne pospruotis, ė tuoliau muokītėis vėsā netinkams. Tėp rašė, nuors aukštoujė aš pabėngiau so pagėrėmo ė bovau gavės vadėnama rauduona dėpluoma.

Vieliau vaduovavau Panerė zuonėnė normatėvu stuotė ė aplė pėnkis metus diestiau statistika Vėlniaus žemės ūkė bogalterėnės apskaituos teknikomė. Bedėrbdams parašiau teknimoma stodėntams skėrta „Bėndruosės ė žemės ūkė statistikas“ vaduovieli, korėiu ėšleida 1975 metās, parašiau ė spaudā parėngiau dā ė „Statistikas laboratuorėniu darbŭ oždoutis“.

Bedėrbdams tamė teknikomė gavau pakvėitėma dėrbtė Lietovuos žemės ūkė ėkonuomikas muokslėnė tūrėma institutė. Pasiŭlėma prijiemiau. Tėn 1975 metās parašiau ėkonuomikas muokslu kandidatėnė disertacėjė ė anou apgėniau. Će gėmė ė aplė 10 ivairiŭ mona sorėktavuo tu muokslėniu bruošiŭru, aplė trīs šimtā ivairiuos apimtėis straipsniu ivairės žemės



Rudis Edvards. 2004 m. D. Mukienės portėgrapėjė

ŭkė ėkuonuomėkas klausėmās.

Vėsā laika moni traukė ė kŭrėbinis darbs. Rašiau ėilieraštius, pruožas kŭrėnelius. Lietovuos atgėmėma metās pamiegėnau rašitė ė žemaitėškā. Tėi mona žemaitiu kalbo sokortė darbelė, padėdont Mukienė Danutė, bova ėšleistė atskėruom kninguom – „Kuotrė“ (1996) ė „Sėmuona malŭnā“ (2001). Pats ėšleidau dā ė trīs ėilieraštius, apėbraižu, nuovieliu kningelės, parašėtas bėndrėnė lietoviu kalbo: „Žemės žalumoj, dangaus žydruomoj“ (2000), „Nuodėmė ant laužo. Istorinė apysaka“ (2008), „Laukai ir jausmai“ (2008).

E. Rudis, Vėlnios, 2015 m. lėipas 17 d.

Rudis Edvards mėrė 2015 m. rogsiejė 15 dėina Vėlniou. Palaiduots Skouda rajuona ĩlakiŭ kapŭs.



Vėlniaus žemaitė dailininka Gruša Bruoniaus paruo duos atėdarimė 2004 m. žornala „Žemaitiu žemė“ re-dacėjuo. Ėš kairies: Grušos Bruonios, Rudis Edvards, Juodpōsis Apuolėnars, Damulis Romoalds, Lasauskienė Genovaitė. D. Mukienės portėgrapėjė